



PRIMEIRO MINISTRO

**ALOKUSAUN
SUA EXELÊNSIA PRIMEIRU-MINISTRU
KAY RALA XANANA GUSMÃO NIAN**

IHA OKAZIAUN SEMINÁRIU

**“XV ANIVERSÁRIU DIOSEZE MALIANA HO JUBILEU TINAN 350 CORAÇÃO DE
JESUS”**

Salão Padre Manuel Luís
Igreja Paroquial de Maliana, Dioseze de Maliana
26 de junho de 2025

Reverendísimu Bispu
Reverendu Vigário-Jeral
Reverendu Kleru ho Madres Dioseze Maliana

Komisaun Organizadora Selebrasoens Maliana

Senhoras no Senhores,

Ho laran haksolok boot tebes mak ha'u mai hamutuk ho imi iha selebrasoens Dioseze Maliana nian ne'e, família boot sarani nian ida-ne'e, hodi partisipa iha orasoens no reflesoens ba anu jubilar ne'e nian.

Permite ha'u hahú felisita uluk Dioseze Maliana, Dioseze foun liu iha Timor-Leste, tanba halo ona tinan 15. Parabéns ba Kleru no ba Madre Dioseze sira, no mós ba ema hotu-hotu ne'ebé kontribui ba prezensa Igreja-de-proximidade ida-ne'e.

Ha'u aproveita mós biban ida-ne'e atu hato'o ha'u-nia rekonhesimentu ho admirasaun ba Reverendísimu Bispu Dom Norberto do Amaral, la'ós de'it ba nia lideransa espiritual no diosezana, maibé mós ba lideransa komunitária ho ninia dedikasaun tomak ba populasau sira, liuliu Likisá, Bobonaru ho Suai.

Selebra Jubileu ida-ne'e, signifika ita rekonhese katak ita hotu saran tomak ona ita-nia-an ba Sagrado Coração de Jesus. No devosaun ida-ne'e tenke pratika, la'ós de'it iha orasoens ho selebrasoens litúrgikas, maibé mós iha asoens, hodi nune'e, ita ida-idak konkretiza apelu Cristo nian kona-ba domin ba ema seluk.

Disponível atu realiza bein comum, ne'e mak halo ita sai katólikis ne'ebé di'ak liu, no liuliu, halo ita sai ema ne'ebé di'ak liu. Maibé ha'u tenke rekonhese katak nein sempre fásil!

Timoroan sira hatene saída mak sakrifísiu. La'ós de'it tanba iha tinan 24 laran hasoru susar no terus oioin husi okupasaun ilegal no violenta, maibé mós, hetan tiha independêsia nasional, sira kontinua hasoru difikuldades loroloron nian bainhira buka atu hadi'a sira-nia kondisoens moris.

Prosesu dezvoltamentu nasional ho konstrusaun Estado ida ne'ebé sólidu no demokrátiku kontinua ezi je sakrifísius ba populasau timoroan tomak.

Hanesan ita-boot sira hatene, sempre fásil liu halakon no harahun ema seluk nia moris no halo ita ema neon nakukun iha tempo funu, duké harii futuru ida ne'ebé sustentável iha tempu pás. Tanba ne'e mak importante tebetebes rekonsiliaun ho unidade nasional ba misaun dezvoltamentu ida-ne'e.

Prosesu rekonhesimentu kona-ba konflitus ho ofensas, atu tuir fali rekonsilia, ne'e mak justisa iha asaun ne'ebé permite ita avansa nu'udar nasaun. No, presiza korajen ho jenerozidade (ka, laran luan no di'ak) husi ita-nia povu atu hala'o prosesu rekonsiliaaun nasional.

Susesu Timor-Leste nian la depende ba vontade ema seluk nian, maibé ba vontade timoroan tomak nian atu rezolve nia problemas ho konflitus husi pasadu. Aten-barani ho diálogu mak lori ita ba rekonsiliaaun ho ita-nia vizinha indonézia, no mós entre feton no maun-alin timoroan sira ne'ebé haree malu la di'ak, liutiha tinan hira moris iha konflitu laran. Ema balu hanesan vítimas tanba funu, seluk tanba ideolojias.

No ida-ne'e mak ezemplu ida ne'ebé Timor-Leste bele partilha ho orgulhu boot ho mundu tomak. Ita hanesan ezemplu di'ak ida kona-ba rekonsiliaaun interna, aleinde rekonsiliaaun ho Indonézia.

No ezemplu ida-ne'e nunka iha relevânsia ida boot hanesan ne'e iha tempu ohin-loron. Mundu agora hasoru dezafius jeopolítikus, sosioekonómikus no ambientais todan lahalimar, dezafiu sira ne'ebé só bele hetan resposta bainhira iha sentimentu umanu, ho baze iha valor sira ne'ebé aas liu hanesan solidariedade, tolerânsia no kooperasaun.

Bainhira ita akompanha atualidade internacional, ita asiste krueldade husi funu, husi konflitu no husi pobreza.

Ita bele haree mizéria umana ne'ebé marka iha ema tokon-nanun sira-nia oin. Ita asiste, maski la fiar, konflitu oioin ne'ebé sobu-rahun fatin barak iha mundu, no iha fatin sira ne'ebé ita haluha lakon ona ne'e, husik hela rastu (ka ain-fatin, sinais) destruisaun ne'ebé hanesan. Ema nia moris, ema nia mehi no comunidade tomak mak lakon leet de'it.

La iha ema seluk mak sente buat hirak-ne'e liu ita timoroan sira-ne'e. Maibé felizmente, ba ita, tantu iha tempu funu komu iha pás, ita bele konta ho apoiu moral no espiritual husi Igreja Katólíka.

Ha'u aproveita hodi agradese ba Madre ho Padre sira hotu ba benevolênsia, solidariedade ho apoiu moral no espiritual ne'ebé ita-boot sira dedika tomak ba povu timor durante 5 dékadas ne'ebé todan tebetebes.

Ita mós konta ho apoiu valiozu husi paízes amigus no parseirus dezvoltamentu ne'ebé fiar iha ita-nia projetu kona-ba pás ho estabilidade nasional.

Jubileu 350 anos devosaun ba Sagrado Coração de Jesus ne'e, hanesan oportunidade di'ak ida atu agradese no atu reflète kona-ba kbiit boot husi domin ba ema seluk no kona-ba benefísius husi kompaixaun, mizerikórdia no solidariedade.

Fosa ida-ne'e, esperansa ida-ne'e, eensia tebes atu, hamutuk ita bele hakat-liu dezafiu sira ne'ebé ida-idak hasoru, no, liuliu, dezafius ne'ebé ita hasoru iha dezvoltamentu ita-nia país.

Exlênsias

Senhoras no senhores,

Tinan uluk ita celebra 25 anos Konsulta Popular ne'ebé lori ita hetan ita-nia independênsia nasional. Tinan ida-ne'e, iha fulan maiu, ita celebra 23 anos Restauraun Independênsia. Maibé, ita labele, no seidauk bele, haluha esforsus ho sakrifisius husi ita-nia povu ba soberania nasional.

Timoroan barak, barak demais mak oferese sira-nia sakrifisiu tomak atu ohin-loron, ita sira-ne'e, bele moris iha liberdade no atu ita-nia oan ho bei-oan sira bele sente saída mak progresu ho dignidade.

Parte barak husi mehi ba independênsia ne'e foka liu iha ideais atu moris hakmatek no atu hetan oportunidade hodi kombate pobreza, atu eduka ita-nia oan sira, atu haree sira moris saudáveis, seguros no realizados. Konkretiza mehi ne'e hanesan selu tusan boot ida hodi agradese ba sira ne'ebé mate mohu ona.

Governu Timor-Leste sira tuituir malu, dezde 2002, halo esforsus boot ba implementassaun políticas públicas ne'ebé bele transformá, sai di'ak liu, sidadaun timoroan sira-nia moris.

Ita sente orgulhu boot ba buat sira ne'ebé ita hetan ona, maibé ita mós hatene di'ak hela ita-nia fragilidades ho dezafius ne'ebé ita kontinua hasoru.

Dezvoltamentu hanesan prosesu naruk ida ne'ebé ezije rekursus finanseirus ne'ebé sei menus liu, ezije rekursus umanus kualifikadus no kapasitadus iha áreas setoriais governasaun oioin, ne'ebé seidauk natón iha país, no ezije, liuliu, esforsu boot ho dedikasaun tomak la'ós de'it husi instituisoens governamentais no públicas, maibé esforsu kolektivu husi sidadaun hotu-hotu.

Tanba ne'e, mak ha'u halo apelu atu imi labele lakon esperansa, atu imi labele deziste estuda, servisu no buka ferramentas hodi desenvolve imi-nia an rasik no, iha esforsu kolektivu ne'e, imi mós bele kontribui ba dezvoltamentu nasional.

Iha Jubileu ida-ne'e, ho laran tomak, mai ita hanoin hikas katak, bainhira kalan-kalan ita-nia ferik ho katuas sira bele toba hakmatek, la ho laran ta'uk, la sente insegurus, ne'e hanesan bensaun ida. Mai ita hanoin hikas katak hamnasa midar ne'ebé ita haree iha labarik-oan sira-nia oin, ne'e hanesan esperansa boot ida. Mai ita hanoin mós katak,

bainhira ita trata ho dignidade feto ida ka joven ida no sira bele hetan oportunidades, ne'e hanesan vitória!

No ne'e ita bele halo tanba ita iha legadu ida, ne'ebé metin ona durante ita-nia peródu rezistênsia, mak domin ba ema seluk domin ba Pátria no fiar-metin iha valores no iha espírito Coração de Jesus.

Tanba ne'e, ha'u husu, atu diosezanu sira hotu iha Maliana, iha selebrasoens ne'e bele saran imi-nia reflesoens ho orasoens iha misaun boot ida ne'ebé ita continua hala'o, mak atu servisu maka'as ba konstrusaun nasional.

Mak hanesan domin ba ema seluk, mizerikórdia (ka laran luan) ba ema sira ne'ebé presiza liu no perdaun ba atus no omisoens ne'ebé ofende ita.

Maibé mos domin ba meu ambiente ne'ebé sustenta ita-nia moris, ne'ebé sai hanesan ita-nia uma rasik, mak, ita-nia natureza no ita-nia planeta.

Ita nia keridu saudozu Papa Francisco husik hela mensajen importantísima ida mai ita kona-ba nesesidade atu tau-matan no respeita meu ambiente, aleinde respeita ema hotu-hotu, ba futuro ida ne'ebé prósperu no sustentável liu, hodi inspira ita atu tau-matan ba ita hotu nia Uma- Boot.

Ne'e signifika trata natureza ho respeito. Respeita ita-nia ekosistemas terrestres no marinhos.

Nein sempre ita hatene, maibé bainhira ita explora irrasionalmente (katak la uza kakukat) rekursus marinhos no terrestres ou, por eezmplu, bainhira ita soe arbiru fo'er iha rai, liuliu materiais husi plástiku, ita kontribui daudaun ona ba destruisaun ita-nia meu ambiente terrestre no marinho, no konsekuentemente, ba insustentabilidade futuras jerasoens.

Tanba buat hirak-ne'e hotu, mak iha Jubileu Sagrado Coração de Jesus ne'e, buat ne'ebé ha'u husu ba ha'u-nia an rasik, mak ha'u hakarak husu mós ba imi hotu-hotu, mak: umildade, bondade ho responsabilidade hodi tau-matan ba ita-nia maluk sira hotu no ba ita-nia Ambiente.

Servi ba ema seluk, respeita ema hotu ho natureza, kontribui hodi kria armonia ho kooperasaun iha ita-nia famílias no iha ita-nia comunidades signifika ita kompromete ona atu sai instrumentu ba pás no amor iha mundu.

Hanesan konkluziun, hein katak Jubileu Sagrado Coração de Jesus ida-ne'e bele inspira ita hotu hodi hakle'an ita-nia fiar no moris nakonu ho amor no kompaixaun. Hein

mós katak ita bele loke ita-nia fuan hodi halo kompromisu atu ita hotu-hotu sai instrumentus ba pás no amor iha ita-nia mundu.

Ha'u hakotu ho votos moris naruk ba Dioseze Maliana, atu nia kontinua leno no fó esperansa ba ita-nia comunidade sira hotu.

Obrigadu.

Kay Rala Xanana Gusmão